

藝文志

篇章

著書目錄

附捐款題名

靈化縣志

第八冊

藝文志

舊志云：「前賢之著作，皆足爲後學之津梁，乃自明迄今，
先輩奏疏條議，類多不朽之言，而窮搜滋憾於殘蝕，各家舊
文集，鴻篇鉅製。美不勝收；茲擇其有裨治譜者，存資考鏡
，至於文學之士，出風入雅，有關土俗風化者，亦酌存數則，
以見一斑。」本志除舊志所載一律照登，並續補傳志數則，及
附列古今著書名目，以存實錄外，其餘詩文泛論，無關地方沿
革利害者，概不登載。

山東旱蝗疏

天啓元年

明御史賈三策邑人

為東省災傷異常濱海關係非小懇乞蠲免加額兵餉以安民心以杜不虞事臣竊惟國家之患莫大於兵荒而兵荒之患單行猶易調停交值則費措處故兵荒之變即聖世不免究之荒不以兵搖兵不以荒挫而海宇安瀾疆場稱狀猷者則拯救切而控御之機宜得也臣腐儒也蒙皇恩不次之擢置之言路臣不敢以風聞者言而以目睹者言臣省山東自春徂夏凡不雨者六閱月二麥盡枯五穀未種子子窮民不復有生之望矣至六月四日一雨而民猶熙熙望秋也鬻衣典產以給耕耘未幾而方茁之芽祇飽蝗蝻之腹臣目睹之請悉其狀焉蝗蝻之始生也如蠅集其齧苗

也如蠶食泉湧而來勢不可禦陷以丈深之壕塹而壕塹旋盈阻以三面之籬藩而籬藩盡滿到處赤地過無留禾然此猶害在一方也不及月而前之有脰能走者且有翼能飛矣半空有聲如風之行中天作障若雲之翳見青草而下集棄枯莖而他之樹葉皆穿穀頭盡剪所在村落擊鼓鳴金以震之而彼不為震也搖旗持杖以驅之而彼不受驅也喊聲與哭聲齊高祝辭與詛辭交致臣不忍聞且見矣而猶未已也臣自起行來時又月餘不雨而蝗子復從穴出矣無論所遺晚禾不能成粒而價高之麥種誰肯復以供蝗口哉來春又何望乎嗟哉二東經乙卯之變死亡者無數而生存者猶喘息未定也茲復遭此災異其何以堪兼之土地鹵薄徭賦

增重加以有加無已之兵餉重以不遑甯處之邊警倘際此時而民窮思亂奮臂疾呼國家其能保無虞哉此臣所為抱杞憂憐民窮而思內患也從來策救荒者不過蠲賑二議依臣愚悃則謂賑不如蠲竊思賑之一說所費皇上者不貲轉輸而下費撫按道司之區畫者無算猶有吏胥之侵漁里甲之尅減而鄉村小民十不得五嘗就民情而計之與其獲望外之一二粒何如去切身之大疾苦乎今民之所苦者無如加派兵餉一事正供之不足何堪額外之需索况東省距遼左僅一海耳於鄰之震非登萊青獨急而濟兗東獨緩也其地雖有遠近而情實無異同何登萊之免其全青州之免其半而西三府之不一議也偏肥偏瘠半榮半枯臣恐其始

為半身不遂究將全體痿痺矣然而當事者已有成議臣何敢復紛紛其口但念被傷之地倍宜加憐就臣所見之切者則有霑化濱州海豐等處所聞之真者則有利津蒲臺武定陽信商河樂陵等處其他未及見聞者則有本省撫臣旱蝗冰雹疊見一疏所列高唐清平等處其在疏中可稽也敢請敕戶部移文山東撫按查有災傷地方將加派兵餉照登萊例一切全免則人之所望賑於皇上與皇上之所欲賑乎民者可以留補兵餉之乏既無輸輓之勞又免缺餉之憂民脫鞭扑之苦又無剝肉之悲是皇上以蠲而兼賑之用小民以蠲而受賑之實者也臣非不欲蠲賑並請也獨念一內帑耳既以餉邊又以賑民不能不為漏卮慮矣豈臣獨為此不

情之言哉故特酌其緩急輕重而陳之倘臣言可採祈皇上熟察之下部
議施行民生幸甚宗社幸甚

穿什異示

天

書之示

日

濟南山東印刷局承印

請減賦文

萬曆四十四年

明邑令段

展涇陽人

為人戶逃亡殆盡縣治傾頽難支懇乞破格優恤以保子遺以維縣治事
職某未受事之前已知山東之災從來未有每閱邸報見地方所繪之圖
並撫按題請之疏情形淒慘摹擬剴切知仁人為地方計至深遠也職到
任僅二月餘曷敢浮拾殘唾重為杞人之憂事有職掌所係國計所關敗
壞而難收極重而不可返者倘忌諱而不言必袖手以誤事語云治之其
未亂也圖之其未形也况事急勢迫挽回之無術措手之無及乎職於七
月十二日履任三日內縣民李汲等即有告荒狀詞茲奉到查勘文移職
即單騎出門遍行郊野清查荒蕪其城西城南田不甚災人不甚稀私心

幸之然不過三四里即曰此海豐界也此陽信界也總計編戶不過四五里耳東至海濱延袤百十里編戶數千家出自東門盡屬荒蕪間有一二種植盡為蝗蝻殘毀行至數里纔一村落有房屋盡行拆毀而墻垣僅存者亦有拆毀八九而僅存一二者有行五六里不見一人者亦有五六里始有里長地方迎接即在馬前手指此某里某甲原人丁若干而今盡死矣此某甲某村原人丁若干徵賦若干其死其逃亦若干今現存止若干俱老穉不能移徙現今無以餬口甘心坐斃矣且有三人一簇五人一叢遮道跪哭面帶菜色衣不蔽體壅塞求救矣職司牧此地見此光景卧不安席食不下咽竊思霑化派糧該銀一萬七千有餘除正項支銷外應解

銀八千六百七十九兩有餘此非從天降非從地湧不過從本縣五千頃地中出之耳不過從當差一萬三千人中辦之耳蓋必有此人然後有此土有此土然後有此財有此用萬古不易之理也今人已逃亡盡矣將令誰耕種此土乎又將何處責成此財此用乎無論職知盡能索即龔黃分符管晏持籌必不能令此不毛之地無人之境猶能供惟正之貢也查霑化地方原與各縣情形不同而霑化敝壞亦非一朝一夕之故其地脈斥鹵百物不宜無論旱澇為災即雨暘時若其收成分數尚不足別縣之半而派糧獨重於別縣即間有肥美者又多為陽信濱州買去今稱寄莊而已差徭將安取足乎且別縣地饒民各安業無連累之苦霑惟地薄故其

民貧民貧則逋欠必多而催科之吏必欲取盈故始而累及於親房繼而累及於族人終而累及於本里本甲不相干之人矣貧而逃者固終無返期富而存者其餘力幾何豈能堪此分外之賠累有不同歸於逃亡不止矣故議復業別縣俱有霑化獨無議墾田別縣俱易霑化獨難今日朝廷德意不過曰賑夫賑行於別縣誠如膏液而行於霑化且恐無人受之也又不過曰蠲夫蠲行於別縣誠解倒懸而霑化不蠲亦恐無處催科矣幸遇院道大人留心地方若是懇切必將霑化一邑破格存恤單疏題請須在正項之內議減分數而於應解之糧量行蠲免則已死者雖不可復生已逃者或尚可復業即今將死未死將逃未逃者或不終至逃亡而縣治

可維持於傾頽之餘矣

卷之二

卷之二

七

濟南山東印刷局承印

條陳荒疲請寬積逋議

邑令 孫錫蕃 黃岡人

為疲邑極壞難支諸弊積重不返敬陳末議以保遺黎事職一介鄙儒三楚末學前訓公安即見霑化水災之詩後任遵化又見山東旱荒之詔不期補授遂綰斯符敢不力為竭蹶以圖報稱顧天下事有易為者有難為者有必不可為者易為者土沃民富賦稅無虧順事而理之難為者賦重民繁頭緒不清猶可竭智畢慮而為之必不可為者土滿人空勢不能為無米之炊不得不起而更張之如今日之霑化是也霑化舊一海落潮灘耳地鹵不毛百不等於他縣漢晉之間屢建屢廢其建也以其地當海口其廢也以其土薄易災自金元以來其幾廢者屢矣明嘉靖間以水災幾

廢賴兩院累疏題覆減賦併里而縣僅存萬歷丙辰又幾廢矣賴兩院累題定例七分追徵而縣又僅存自順治四年釐正錢糧照萬歷初年則例起科而霑化荒亡過半額項不敷當時有司支吾目前無能為民請命者遂增重於現在之田糧不惟不等於萬歷初年且有加於崇禎末年矣如上地之三分進而四分五釐餘也中地之二分四釐進而三分八釐餘矣下土之一分八釐進而二分七釐餘矣地土劣於海豐而賦稅四倍於海豐肥饒不敵陽信之什一而起科一等於陽信使當時守土者按其故籍呼籲而力陳之何以積弊至此况縣自順治七年以後滄沒者十餘年近又荒旱者二三歲其不廢為荒堞曠土者計惟有變計而更張之已耳職